

ARLeF: un sî convint al Teatri Stabil Furlan

Eros Cisilino: la iniziative e permetarà di puartâ in Friûl gnovis risorsis economicis

“La ARLeF - Agenzie Regjonâl pe Lenghe Furlane, di simpri e sosten cun convinzion il “Teatri Stabil Furlan” intindût tant che un progjet che pe prime volte al met a sisteme cualchi sogjet tra i plui cualificâts dal mont dal teatri e de culture in Friûl, cul obietîf ancje di costruî relations cun altris istituzions impuartantis dal teritori, nazionâls e internazionâls”. Cun chestis peraulis il President de ARLeF, Eros Cisilino, al condivîf ad implen la iniziative che, dongje de ARLeF, e viôt insiemi il Comun di Udin, la Fondazione Teatro Nuovo Giovanni da Udine, la Academie “Nico Pepe”, il CSS, l’Istitût Ladin Furlan e la Societât Filologjiche Furlane.

“L’intindiment – al va indenant Cisilino – al è di rivâ a di une strutture inovative e lizere inte sô operativitât di gjestion, cuntun progjet culturâl e di cualitât, e soredut originâl intal plui larc sisteme teatrâl regjonâl e nazionâl. Un progjet che al à tant che fonde la unicitât culturâl dal nestri teritori, mosaic di lenghis e di popui, e che al dopre la lenghe furlane cun chê di rivâ ae straordinarie varietât de propueste culturâl europeane. Une iniziative che e mancjave e che, propit pes motivazions za ditis, si à di intindi tant che un invistiment, che al permet di puartâ in Friûl gnovis risorsis economicis: midiant di fonts europeans, di fonts ministeriâi (Fus), di coproduzions e de vendite di spetacui fûr de regjon.

“Cun di plui – al marche Cisilino – cheste iniziative nus permetarà di jessi in linie cui standards europeans in cont di tutele des lenghis minoritariis. Se si lassin in bande i câs dal sloven e dal sudtirolois in Italie, se si pense, par esempi, al Gales, cul “Theatr Genedlaethol Cymru” – il Teatri in lenghe galese – fondât intal 2003, ae Catalogne, cul “Teatro Nacional de Catalunya” fondât tal 1996 e al País basc, che intal 1993 al à costituît un organisim di pueste clamât “Sarea”, la rêf basche dai teatris. E cence considerâ che in Galizie a son lâts ancjemò plui indenant cu la istituzion, intal 2008, di une Agenzie regjonâl di pueste che e à l’obietîf di promovi e consolidâ dut il tiessût imprenditoriâl intal setôr culturâl galego”.

Udin, ai 28 di Jugn dal 2019

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<